

DISSERTATIO MEDICA,  
INAUGURALIS,  
DE  
FEBRE PUERPERARUM,  
QUAM  
ANNUENTE SUMMO NUMINE,  
Ex Auctoritate Reverendi admodum Viri,  
D. GULIELMI ROBERTSON, S.S. T.P.  
ACADEMIÆ EDINBURGENÆ Praefecti;  
NEC NON  
Amplissimi SENATUS ACADEMICI consensu,  
Et nobilissimae FACULTATIS MEDICÆ decreto;  
PRO GRADU DOCTORIS,  
SUMMISQUE IN MEDICINA HONORIBUS AC PRIVILEGIIS  
RITE ET LEGITIME CONSEQUENDIS;  
Eruditorum examini subjicit  
GEORGIUS PITT STEVENSON,  
MARILANDICUS,

Societ. Phys. Americ. Praefes annuus;  
Nec non,  
Lyc. Med. Lond. Sodalis.

Ad diem 24. Junii, hora locoque solitis.

EDINBURGI:  
Apud BALFOUR et SMELLIE,  
Academiae Typographos.

---

M,DCC,LXXXIX.



Digitized by the Internet Archive  
in 2020 with funding from  
Wellcome Library



HENRICO STEVENSON,

ARMIGERO,

Sibi

Natura, Animo, Confiliis,

Patri optimo ;

Nec non,

ALEXANDRO STENHOUSE,

ARMIGERO,

Amico,

Ob animi candorem,

Mores commodos rectosque,

Semper colendo ;

Hoc opusculum,

Summae observantiae et pietatis

Testimonium,

Lubens offert

GEORGIUS PITT STEVENSON.







DISSERTATIO MEDICA,

INAUGURALIS,

DE

FEBRE PUERPERARUM.

---

HISTORIA.

**M**ORBUS quidem hic saepius secundo tertiove die, alias autem sub vel inter ipsum puerperium, alias horis quatuor viginti, alias, ut credere par est, quocunque tempore per intervallum quinque aut sex hebdomadam a partu occupat. Caeterum, id quod inter omnes constat, quo citius advenit, eo periculosior est.

A

Nulli



Nulli fane cuidam puerperae proprium<sup>s</sup> est ; namque tam mulieribus facile, quam laboriose enixis ingruit. Hoc autem notatu dignum est, quod, etsi nemo omnino cujuscunque temperamenti habitusve secura esse potest, tamen plerumque graciles, molliores, atque irritabiles invadit.

Incipit fere ab horrore, interdum maximo, alias tali, qualis notari vix potest. Multi adeo dixerunt, sed temere, ut mihi videtur, et posse, et aliquando reapse, sine hoc accidere. Calor quam citissime excipit, nec non cibi fastidium, nausea, vomitus, capitis dolor, isque in fronte praesertim, languor, infirmitas, inquietudo, sitis, &c. Cutis modo arida, modo sudor vel ex parte, vel toto corpore prorumpit. Lingua initio est humida atque albida ; deinde ficca, aspera, atque obducitur veluti subfusca aut subnigra crusta, unde dentes quoque itidem colorantur.



Frequenter mulier repente corripitur, quippe quae prius paulum modo torporis in extremis partibus, frigusque per dorsum descendens senserit.

Arteriarum pulsus initio maxime variat; inter horrorem est tenuis, debilis, atque indistinctus, plenior calore crescente, et plerumque tamensus ac plenus, quam in morbis, ubi vera inflammatio adest; verum hae posteriores notae haud sane diu remanent.

Paulo post excipit sensus molestiae ac doloris, qui raro totum abdomen, sed hanc illamve partem, praecipue inferiorem, torquet. Interdum latera invadit, et ad scapulas, sicut in pleuritide, ascendit, interdum partes circa spurias costas adeo urget, ut jecur aut lien affici videatur. Ast ubicunque ortus sit, brevi latius acriusque infestat; descendit ad ~~fx~~emina, vesicam, et rectum intestinum, quae omnia varie excruciat.

In-



Interdum ita exsuperat, ut cubans nec vestimenta ferre, nec sermonem explicare queat ; itaque lugubriter subinde ejulat, atque adstantibus nihil respondere valet.

Vultus fit turbatus, tristis, atque acer ; saepe tremoris aliquid, aut subsultus tendinum insequitur, atque interdum, sed tamen non plerumque, delirium. Interea quoque abdomen multum tumescit, nonnunquam aequae atque ante partum, hujusque quidem rei ipsa ita conscia, ut incrementum describat.

Tergum et nates dolent ; interdum alterum aut ambo crura summo cum dolore tument.

Spiritus gravitas plerumque est ab initio, eaque pro dolore abdominis variatur. Aspiratio est crebra, ac quasi ex metu brevis, quae quidem, crescente morbo, talis demum evadit, ut sub mortem pectus vix moveri videatur.



Vires de subito adeo deficiunt, ut paucae, haud ita multo post initia, sese in cubili ipsae vertere queant; itaque semper fere resupinae jacent.

Tussis, minime quidem propria, sed omnino fortuita, frequenter adest; solet tamen plerumque per se male habere, eademque vehemens periculum faceffit.

Nausea, vomitus, et diarrhoea interdum, eaque tam violenta, quam in ipsa cholera existunt, praegrediuntur; alias haud ante diem secundum, tertium, quartumve, adveniunt.

Humor, qui prius evomitur, est viridis, aut subflavus, aut subniger; sed si vomitus diutius manet, vel sub morbi finem redit, tum fit aqueus subnigerque. Vomitus fere dolentem stomachum levat; eidem vero decrefcenti vehemens dejectio cum torminibus superveniunt.



Incipiente diarrhoea, quae raro abest, alvus est subviridis, aut fusca, spumosa, et mucosa; unaquaeque dejectio paulisper levat; stercus, morbo crescente, pessime olet, idque interdum sine voluntate redditur.

Contra ea autem alvus nonnunquam protinus inter initia adstringitur, eademque diutius semperve manet.

Lochia variant; etsi enim a rigore haud raro supprimuntur, frequenter tamen eodem genere copiaque per totum morbi spatium prodeunt; est ubi omnino sistunt; saepeque ubi continuant, nigra fiunt, ac pessime olent.

Ægrae interdum lac haud adeo deest, ut infantem suis uberibus alere nequeat; saepe autem, morbo vehementius ingravescente, contra fit.

Urina



## DE FEBRE PUERPERARUM. 7

Urina minore copia profluit, fere rubrior, ex qua interdum aliquid, saepe nihil omnino, defidit.

Petechiae, vibices, pustulae miliares, frequenter, haud ita multo post initium, gravibus in regionibus apparent.

Huic quidem feбри, id quod ill. Home \* et Denman † omnium primi notarunt, proprius est tumor erysipelatosus subruber, qui super condylos, carpos, cubitos, genua, talos vel ad *solidi* magnitudinem interdumque amplius incrementum. Hoc signum semper esse mortiferum Denman affirmat; temere autem; aliquot enim ita admodum affectae convaluerunt ‡.

Prae-

\* Vide Clin. Ex. p. 75. † Denman, p. 24.

‡ Vide sis, " Practical Observations on Puerperal Fever, by Philip Pitt Walsh, M. D. p. 4." Hujus equidem



Praeterea illud ignorari non oportet, febrem hancce saepe morbum, quocunque tempore per populum grassantem, simulare ; unde varia ejus signa quam plurima.

Varie autem, pro aegrae curatione, sua vi, &c. durat ; plerumque, nisi pestifera, tribus, quatuor, vel quinque diebus finiri potest ; imo etiam aliquot quatuor viginti horis convaluisse visae sunt. Hoc utique statuere licebit, quod post octavum diem mortis periculum multo minus est.

Ægrae

quidem memoriam, mihi sacrosantam recolens, nequeo quin nunc ipsum Latine dicam,

—————“ Bene placideque quiescas,

“ Terraque securo fit super ossa levis.”

Mors certe, eo immature extincto, fructus ingenii acris, diligentis industriae, nec non complurium aliarum virtutum, in quibus magnopere eminebat, tum medicis, tum ipsis hominibus, invidiosa abstulisse videatur.



Ægrae frequenter complures per horas, imo vero dies, ante mortem dolore vacant, ideoque sibi convalescere ipsae videntur; attamen pulsus arteriarum fit celerrimus, adeoque imbecillus, ut vix *sentiri* possit, facies rubet, et difficulter spiritus redditur.

Tempus, quo jugulat, in aliis aliud est. Aliquae ipsa rigoris accessione victae sunt \* ; nonnullae post decimum, quintumdecimum, imo etiam duodevigesimalum diem occiderunt †.

Aliis, quae convaluerunt, abscessus in variis corporis partibus aborti sunt; quaedam lentis febribus remittentibus laborabant; ac multae adeo debilitatae sunt, ut ipsis, aliquamdiu post mala signa remota, nolentibus alvus redderetur.

B

Nihil

\* Manning.

† Hulme, p. 18.



Nihil profecto mirum est, si medici, nostrae aetatis consultissimi, ad malum, tam frequenter exitiale, pro se quisque acriter intenderint animum, ejusque causas ex corporibus incisis eruerent, aptioremque inde curationem proponere, tentarint. Convenit igitur visa ex cadaveribus saepissime oblata referre.

Ex earum abdomine, quibus tumor est magnus, copia materiei pessime olentis profluit, multumque liquoris istiusmodi inter intestina, atque in pelve natat. Intestina aliquando aëre multum distenduntur. Pene omnia in abdomine contenta plus minus vitiantur. Omentum, ut aliquot dixerunt, saepe inflammatione magna, aut suppuratione, aut gangraena afficitur, et nonnunquam fere omni sua adipe spoliatur.

Uterus plerumque est suae propriae conditionis, interdum inflammatione afficitur, magno-pere ampliatur, in eo abscessus, atque etiam lividae



vidae maculae passim videntur \*. Ovaria nonnunquam suppurant, et quasi emortua livent †.

Canalis tota, intestinalis quae audit, aliquando inflammatione afficitur, saepissime autem pars ista, quae in abdomine medio jacet proxime supra pubis os, eidemque aliqua adhaerent, et gangraena videtur incoepta. Ventriculus ac jecur inflammatione quoque corripuntur. Liquor lactis instar coagulati interdum intestinis adhaeret, atque idem in thorace cernitur. Caro abdominis musculosa paulo supra pubis os aliquando gangraena ipsa vitatur.

### PRÆDISPONENTIA.

Uterus certe, ac totum fortasse corpus, multimodis maximeque a graviditate mutantur. Cibi  
fastidium,

\* Hist. de l'Acad. Roy. des Sciences.

† Hulme, Pouteau.



fastidium, nausea, vomitus, insolitae appetitiones et aversiones, abunde testantur sanitatem perturbari.

Uterus, novem per menses, pelve emergens, paulatim adeo ampliatur, ut partem abdominis bene magnam occupet. Corpus jam multo magis irritabile fit ; itaque res, alias nihili habitae, interdum vehementissime commovent. Inter auctores convenit, molliores, sensiferis motibus morbisque locorum opportuniore, debilitatas animi vitiis corporisve, praecipue omnium huic malo patere.

Mulieres deinde, ex quo pepererint, gravioribus periculis expositae sunt. Phthisis, verbi causa, fere per graviditatem levatur multum, aut toleratu facilior ; atque a partu eadem ipsa vehementer adeo ac subito repetit, ut interdum diebus aliquot, et saepe intra mensem, jugulet. Febris utique, de qua agitur, nunquam nisi post



post aut sub puerperium occupat. Hoc igitur cum graviditate jure hic in primis omnium notari debent.

Sanguineum temperamentum, etsi haud perinde atque ejus contrarium, quodammodo tamen huc spectat.

Quodcunque crescenti plenitudini favet, velut cibus copiosior, vita otiosa ac sedentaria, et praecipue ista curatio, qua sanguis, incisa vena, foeminis uterum gerentibus, mittitur; quodcunque corpus extenuat, ut cibus parcior, aut in quo parum alimenti est, vomitus et dejectio immodica, exercitatio vehemens, somnus nimium vel brevis vel longus, hujus sunt generis, &c.; necnon quidam animi affectus, ut repens terror, aut longa aegritudo, adeoque gravidæ innuptae magis periclitari dicuntur.



E lecto quoque puerperam nimis cito surgere, nimisque diu erecto positu manere, malum est. Adeo cel. Sydenham praecepit, ut puerperae, quas ipse curabat, novem per dies in lectulo detinerentur. Quod quidem supervacuum est, imo etiam aliquando nocere potest.

Cubantibus deinde, ut mos fuit antiquis, atque usque adhuc ab imperitis fieri solet, calorem ingentem movere, vestimentis nempe injectis, et conclavi adeo incluso, ut perflatus nullus accedat, itaque sudorem plures per dies continuum, eundemque majorem vino, calidis, atque aromaticis liberalissime potui datis, &c. diffundere periculosissimum est. Contra autem frigus inconsulte admissum, id est, subito nimisque longe, quam noxium esse ipsa evidentia docet.

Deinde tarda alvus, cibus haud idoneus, saepe multum laedit, caro praesertim nimis cito assumpta, quippe quae diathesin ad inflammationem,



nem proclivem, phlogisticam quam vocant, adauget, suaque sponte in putredinem abit.

Denique, obstetrix ignara atque imprudens hic notari debet, utpote quae multum injuriae utero, praepropere scilicet partum accelerando, perque vim abripiendo placentam, saepissime infert.

Postremo, omnis uteri vel vicinarum partium irritatio, urina aut alvus inhibita, abdomen indusiis fasciisque constrictum, supra propositis annumerari possunt.

## E X C I T A N T I A.

Illud quidem apud auctores est, quod haec febris iisdem anni tempestatibus, eodemque ipso tempore,



tempore, quo malignae, saevit. Putrida quoque ex corporibus hominum, qui unum in locum coarctentur, ei occasionem praebere dicuntur; itaque in valetudinariis, iisque praesertim frequentissimis, atque in ima plebe, qui munditias itidem, ut superiores nec facere volunt, nec queunt, fere versatur. Hinc opinari licebit, eam per contagionem propriam excitari.

### DE MORBI NATURA QUÆDAM.

De ipsa quidem morbi natura auctores inter se multum dissentiunt. Complures ingeniosissimi tam superiorum, quam nostri seculi, meditatae commentationes protulerunt, et suam quisque deinceps, ut fit, quomodocunque prioribus diversam, venditarunt, quasi unicam, ex qua indicia, causae, &c. intelligi, nec non rationalis medicina instrui posset.



Ab Hippocrate, nostrae professionis conditore, usque quo D. Sydenham ipse exortus est, multi hoc malum ad lochia suppressa, itaque morbidum humorem, putridum quem illi credebant, intro repulsum, retulerunt. Quod recentioribus minime probatum, quippe qui contendunt, nil omnino esse inter lochia, necessario nimirum ex vasis omnibus, per placentae separationem ab utero distractis, prodeuntia, quod saniosi malignive generis putari debeat. Lochia quidem, seu deficientia, seu abundantia, molestiae quid facessere queunt; sed argumenta in promptu sunt, quibus colligere licebit, morbum, de quo agitur, neque purgamentis corruptis, neque vero iisdem suppressis, fieri. Constat enimvero, huiusmodi profluvium non modo aliis esse aliud, verum iisdem alias aliter, idque pariter innoxium, imo etiam ipso primo die saepe impune sisti.



Swieten, Levret, aliique lac, vitiose in varia corporis cava delatum, quasi causam hujus morbi, notarunt. Haec autem opinio, edita saepissime ac defensa, fortasse tamen est falsa. Lac enim frequenter abundat aliquamdiu inter morbum; deinde, aliquando est exiguum, aut etiam deficit, sine ullo periculo; deinde, frequenter affatim ejus prorsus adest, febre occupante, quae tamen nunquam advenit mulieribus, dum infantes tandem alere uberibus desinunt; postremo, idem a suo proprio cursu aversum, vel impeditum, molestiae quiddam, nil tamen periculi, ut videtur, faceffit.

Solers ille atque elegans White, cui medici plurimum debent, certam<sup>u</sup> affirmat, febrem hanc aut aëre corrupto, aut fordibus in intestinis coacervatis, aut plano cubantis positu, unde acrior materies coacta absorbetur, semper oriri; nisi si quando os internum violenter dilatetur,

aut



aut partus, aut placenta elidantur, aut malae quid curationis fuerit adhibitum \*.

Omnia autem illa, nunc memorata, frequentius in valetudinariis, ubi complures eodem in conclavi continentur, ac munditiae parum fiunt, accidere necesse est.

Auctor idem ait, se ipsum semel vidisse omnes singulos cujusdam familiae Syncho vel Typho correptos, quippe qui aegram hujusmodi sub eodem tecto cubantem curabant †.

Multi contra asseverant, hunc morbum ex inflammatione gigni; verum ejus de sede discrepant. Hippocrates, hujusque discipuli, ut Hoffman, Burton, Smellie, Denman, &c. uterum;

Hulme

\* White on the Treatment of lying-in Women,  
p. 132.

† Ibid.

Hulme \* vero et Leake † omentum atque intestina praecipue omnium affici arbitrantur.

Priores ita opinantur, quia nempe dolor fere istud circa viscus incipit; urina fit exigua, quasi inflammatio protinus ab utero ad vesicae cervicem pervenerit; deinde, morbus ipse tantummodo circa, vel post partum, isque comitatus plerumque lochiis, quadamtenus copia aut genere mutatis, apparet; denique, uterus, cadavere inciso, saepe vitiatus deprehenditur.]

Posteriores asserunt, sententiam suam niti in ratione quidem ipsa, ex indiciis tam vivarum, quam cadaverum, satis accurate instituta.

D. Hulme gravidum uterum, prementem scilicet intestina atque omentum, omnium, quae

Prae-

\* Treatise on Puerperal Fever.

† On Child-bed Fever.



Praedisponentia nominantur, valentissimum esse judicat. Hinc, ait ille, circuitus sanguinis, visque vaforum eundem vehentium minuuntur. Quo propior est partus, eo mala ex hoc pressu majora fiunt. Adeo ex partu, vasa, quae uterus maxime premebat, protinus sanguine implentur; haec vero ipsa, jam infirma nimirum, vix humores suos proferre sufficiunt \*.

Idem quoque putat, quaecunque post partum, sanguinis circuitum augeant, atque inter graviditatem eum succosve corrumpant, hunc morbum quam maxime omnium excitare †.

D. Leake contendit, febrem puerperarum omnino ab hysteritide differre; quippe quia, ait ille, huic fere capitis dolor deliriumque, et semper acerrimus dolor calorque in vulvae regione, illi vero plerumque nihil tale quid adest ‡. Ve-  
rum

\* Ibid.

† Ibid.

‡ Ibid.

rum enimvero nihil invenitur magis hoc certo certius, quod vulvae regio saepe inter ejusmodi febrem dolore acerrimo cruciatur, et delirium capitisque dolor immanis aliquando adsunt.

Idem quoque existimat, inflammationem omenti atque intestinorum proximam esse causam, subitamque circumeuntis generis mutationem, a partu factam, necessario inclinare ad abdominis inflammationem, itaque omentum atque intestina, utpote laxiore natura, saepissime omnium affici \*.

Praeterea, inquit ille, parturae dolores, et gravis tempestatum habitus, nec non corpus ipsum jam mobilius, aliaque praedisponentia supra proposita, suo quidque modo, febrem excitare tendunt †.

Sic

\* Ibid.

† Ibid.



Sic ipse hunc morbum vere ex inflammatione oriri putat, quanquam signa putredinis accesserint. Quae quidem, ut ei placet, materiae corruptae ex omento suppuranti illatae debentur, ideoque velut sequentia duntaxat ex affectu primario habenda sunt.

Jam vero ex hac opinione aliquis confestim credere voluerit, omentum semper in cadaveribus aut suppuratione, aut gangraena affectum videri. Verumtamen curiosior inquisitio atque investigatio ab ill. Home, aliisque facta, prohibet vetatque.

Caeterum, White auctore \*, affirmare liceat, intestina atque omentum saepissime in perniciosiss febris, putridis aut malignis, inflammatione et gangraena corripitur; cum eo tamen, ut hae partes neutiquam primaria sedes morbi existimari

\* Ibid.

istimari debeant, ideoque talia in cadaveribus reperta velut ex aliquo sequentia duntaxat, minimeque propria morbi haberi oporteat.

D. Hulme ait \*, omentum, partu jam instante, aut planum esse, ut natura solet, aut corrugatum, aut fortasse haud raro sursum ferri a gravido utero complicatum, atque adeo periculum fieri majus circuitus interclusi. Hinc White interrogatione instat, annon, si tale quid fiat, morbus ante partum potius foret, eodemque ipso facto finiretur? Quod certe futurum esse ipse nullus dubitat, si puerperarum febris atque interclusio intestinorum et omenti, quae in hernia fit, causis vere similibus oriantur; utpote cum pessima signa posterioris illico tolluntur, nisi si inflammatio longius processerit, simul ac primum pressus interclusionem istam efficiens seu arte, seu natura, tollitur †. Porro autem

ex

\* Ibid.

† Ibin.



ex D. Hulme sententia nulla causa probabilis afferri potest, cur hic morbus frequentior fiat atque exitiosior in oppidis et valetudinariis, quam rure atque in privatorum domiciliis.

Illud inter auctores satis convenit, inflammationem feбри puerperarum adesse; de hujus autem peculiari specie non item; alii enim phlegmonodeam, alii erysipelatofam appellant.

Fauces quidem ac totum canalem, alimentarium quem vocant, inter hunc morbum aphthis atque erysipelate affici, haud dubiis constat argumentis. Sic lingua male se habet; dolor urens tendit per os, guttur, atque omnia intestina, qui celerius saepe diarrhoeam affert, atque haud raro post alia admodum levata perdurat.

Verum enimvero si cum medico, nosologia celeberrimo, qui, jure quam optimo, medicae opis, rationalis maxime, inventor auctorque

nunc praefens habeatur, quique, clarus postgenitis, sicut Hippocrates, Harvey, et Boerhaave, suum et ipse seculum nobilitabit, proponamus, erysipelas fieri posse tantummodo in superficie cuticula obducta ejusdemve continuatione, quae neutiquam ad viscerum in abdomine peritoneum pervenire queat; aut si cum quolibet, istarum rerum haud incurioso, animadvertamus, nunquam ullum scilicet pus subesse, neque vitiosam lympham coagulandam exsudari, neque adeo vicinas partes agglutinari, quotiescunque inflammatio erysipelatis mere exstiterit; tum denique ad putandum facile inducemur, inflammationem, quae huic morbo adsit, haud esse eam, erysipelas quod specialiter vocatur. Verumtamen nihilo minus patet, puram ac simplicem haud esse peritonitida, quippe quod signa putredinis nunquam non apparent, morbus ipse contagia agit, diarrhoea subsequitur, &c.



Re quidem vera inflammationem hancce suo certo ac proprio vocabulo nominare in promptu non est. Caeterum observatio docet, eam citius communi suum cursum peragere; comitemque morbi, qui ex debilitate oriatur, ipsam nasci potius congestione atque auctiore affectae partis, nec non totius corporis, irritabilitate, quam adaucta duntaxat vi ac tensione vasorum, quae corripiantur, aut cordis aut arteriarum.

Inter omnes fere convenit, febrem hanc, ubicunque genitam, esse unius pene et ejusdem naturae, variantem nempe gradu signorum tantummodo, aliisque tam parvis, quae diversam speciem formare nequeunt. In hoc quidem praecipue variare videtur, quod aliquando, praesertim in privatis domiciliis, istam, quae ab inflammatione nascatur, ab initio magis refert; aliquando, amplis scilicet in valetudinariis, imbecillitas et signa pejora celerius clariusque cernuntur.

Caeterum,

Caeterum, ex supradictis, ut videtur, colligi potest, morbum hunc non esse sui generis, puerperis proprium et peculiare, sed insolitam duntaxat speciem frequentissimi morbi, id est, nihil praeter communem febrem, quae contagia agat, eamque inflammatione peritoneum late magis aut minus occupante comitatam. Quod quidem, paucis breviter et in transcurso memoratis, probabile admodum esse videatur.

Idem contactus semper similem parit morbum.

Morbus certe sua contagia agit; oriturque eadem inter tempora et loca, quae omnium maxime communem contagionem importent.

Nutrices, quae parturientibus affidere solent, frequenter communi Synocho vel Typho corripiuntur.

Ambo



Ambo denique morbi semper fere eodem anno quasi per populum grassantur, iisdemque remediis plerumque levantur.

Nunc vero illud probare, quod inflammatio, eaque late occupans, morbis ex debilitate ortis adesse potest, supervacuum est, quippe quia id ipsum a D. Pringle, White, aliisque, communem ad febrem quod attinet, demonstratum fuerit.

Postremo, huc accedere potest, quod Peritonitis frequenter vel in viris typho supervenit.

## D I A G N O S I S.

Puerperarum febrem aliis fere omnibus morbis dignoscere expeditissimum est.

A doloribus, posteriores quos vocant, eo differt, quod inter illos, ex intervallo fere redeuntes, febricula plerumque est levis; in hac autem dolor est certus, febrisque fatis molesta.

In febre, lactea quae dicitur, semperque levissima est, mammae atque axillares glandulae fere intumescunt; altera vero est vehementissima, et mammae vix afficiuntur.

Dolor et molestia abdominis, cutis punctiunculis vacua, animi trepidatio major, eam a febre miliari apertius distinguunt; praeterea pustulae vix unquam oriuntur; et si aliquando ortae sint, nihil tamen hic, fere autem in altera, juvant.

Intuentibus febrem, molestiam, atque abdominis dolorem, eumque non huc illucve transeuntem, a colica discerni potest. In hac quidem dolor saepius febrem sequitur, quam praecedit; istum magis refert, qui circa umbilicum tor-  
queat;



queat; non tam late occupat, nec pariter urget; ferius tumentia ac tensione abdominis comitatur; in colica denique, haud videtur tristis ille vultus animusque meticulosus, quae semper fere alteri adfunt.

Haud multum fane periculi est, ne non ab inflammatione cujuslibet visceris, sede nimirum doloris arctiore, evidenti imminutione actionis propriae parti, natura praesentis febris, origine hujus, incremento, &c. rite animadversis, dijudicari et distingui queatur.

## P R O G N O S I S.

Nullus quidem morbus animadversionem diligentiamque magis desiderat. Quamvis enim per se interdum finiatur; attamen, nisi inter initia adhibeatur curatio propria, brevi saepe tollit.

tollit. Si protinus a partu occupat, atque aliquot per dies, imo etiam horas, vehementer intenditur, spes nimis saepe frustratur.

Pulsus arteriarum citatus nunquam non malus est ; idemque eo peior, quo languidior tenuiorque. Si autem contra fit, securitatem pollicetur.

Dolor abdominis ingens simul cum gravi difficilique spiritu periculum ostendunt.

Ubi dolor subito definit, pulsus arteriarum fit languidus tenuisque, facies pallida, sudores frigidi, et stupor deliriumve excipiunt, mors denunciatur.

Alvus inter morbum adstrictior mala est.

Alvus fusior protinus ab initio semper levat ; utique si cutis humescit, atque abdomen sub-

dit,



dit ; quorum vero posterius sine purgationibus, et cum arida cute, periculofissimum est.

Lochia subinde prodeuntia semper inter bona, imo etiam optima, indicia sunt.

Lingua subalbida, mollis, et humida metum detrahit ; si autem contra fit, non item.

Vomitus fortuitus aliquando morbum confitere testatur ; ubi autem is est nigri coloris, in malis aegra est.

Sudor inaequalis periculum subesse indicat ; si vero toto de corpore fluit, nec non urina fit parum liquida, atque arteriae concidunt, spes superest. Sudor iste, qui interdum plurimus horrorem excipit, aliquando summi incrementi index est.

**E**

Petechiae,

Petechiae, praesertim erysipelatis tumores, supra memorati, mali sunt.

Denique, vigilia, praecipue ubi acerbi et continui dolores capitis simul adfunt, nunquam non formidolosa est.

#### RATIO MËDENDI.

Nonnulli fortasse putarint, haud ab re fore, pauca de morbo *arcendo*, prophylaxis quae audit, praefari. Cum vero de causis remotis, sine quarum aestimatione morbis occurri nequeat, fusius jam dictum sit, nihil insuper de illa seorsum differere opus esse videatur.

His igitur praepositis, ad curationem protinus transibo. Quae quidem duplex est; namque  
aut



aut febris dolorque expugnanda sunt, aut indi-  
ciis quibusdam obviam eundum est.

Quod ad prius consilium attinet, sanguinis  
missio ultro se offert. De hac vero inter auc-  
tores ambigitur; alii enim eam et probant et  
laudant; alii contra non modo ut supervacuum,  
sed etiam periculosissimam reprehendunt cul-  
pantque. Si quidem ex arteriarum pulsu ab  
initio judicandum foret, tum ea plerumque  
praeciperetur; sed si animadvertatur, tempore  
quam brevi ille tensus plenusque existit, quae  
ingens debilitas, signaque putredinis manifesta  
illico subsequuntur; quantopere vis vitae im-  
minuitur, atque adeo localis congestio eaque  
ipsa causa augentur, unde plurimum periculi  
circa finem morbi timeri possit; tum fane statu-  
endum erit, scalpellum esse noxium, anceps cer-  
te; et, si modo unquam, inter initia duntaxat  
adhibendum esse, idque in validioribus, ubi fe-  
bris

bris videatur esse ejus generis, sporadicum quod nominatur, atque omnino nunquam in valetudinariis, ubi malignitas ejus quam maxima signis haud dubiis notetur.

Medici profecto nostri seculi hac in re a superioribus adeo multum deflexerunt, ut affirmare liceat, sanguinem hodie semel omnino, pro eo quod vices olim solebat, mitti. Cujus mutationis hodierna utique curatio vulgaris febris, quae contagia agat, (cui quidem non est facies eadem ac puerperarum febre, nec diversa tamen), insigni est documento. In ea enimvero antiqui semper fere, nec non recentiores quos appellare jus est, per sanguinis detractionem pugnant; praesentes contra repudiant hanc rejiciuntque, quippe qui experti norint, summa nempe debilitate, inflammationis signa citius excipiente, periculum sanguine misso admodum augeri; atque adeo illos, qui metu inflammatio-



nis moti ita curarint, saepius causam poenitendi, quam recordandi, habere.

Caeterum, his servatis, aliquando haud alienum erit, cucurbitulas accommodare, hirudinesve parti abdominis maxime dolenti imponere.

In confesso est, vomitoria tum ab initio, tum inter complurium morborum incrementum, data commode satis respondere; sed nusquam plus, quam in puerperarum febre, profecerunt. Hoc autem salubre ac frugiferum repertum fortasse D. Denman auctori acceptum referri debet. Ut-  
cunque erit, medici tamen, qui deductos in valetudinarium, *L'Hotel Dieu* dictum, Lutetiae Parisiorum, nutriunt, atque in primis Doulcet, ei potissimum institerunt, quippe qui, missione sanguinis neglecta, aegras hoc morbo vomitu, non solum inter principia, sed etiam plures per dies, curiosius facto, felicissime expediunt.

Ex efficaci igitur curatione, ab iis aliisque huius insulae adhibita, vomitum moveri oportet; neutiquam tamen, secundum Doulcet, quo tempore cunque; etenim, cum abdominis dolor admodum urgeat, atque debilitas adfit magna, minime convenit, siquidem omnis vehemens agitatio, in ejusmodi casu, tum inutilis, tum etiam periculosa, evadere potuerit.

Febrem hanc aliquando a vomitu incipere, supra positum est. Sub quo casu, invitare eundem, tepida nempe aqua, aut chamomaeolo decocto, aut quodam ex stibio, ita ingesto, ut stomachus exoneretur, et sanguis ad corporis superficiem avertatur, nunquam non expediet.

Inter eos vero, qui vomitum praecipiunt, de potiore medicamento paululum quid dissensionis est. Alii enim, ut medici in Gallia, ipecacuanham, alii ut D. Denman, &c. tartarum emeticum, collaudant. Omnibus quidem notum est, utrumvis



utrumvis horum fatis commode vomitum movere; posterius vero, quippe quia insuper fere alvum purgatione sollicitet, id quod huic morbo non parum auxiliatur, alteri praeferendum esse videatur.

Caeterum, de medicamentis hujusmodi, quorum facultates nemo nescit, in praesentia certe pluribus differere supervacuum est. Satis erit dicere, talia, utpote quae, id quod, hoc morbo substante, votum est, sanguinem ad corporis superficiem avertant, aequabilem illius circumactionem praestent, atque adeo solvant constrictionem febre effectam, impetumque interiores ad partes vitiosum arceant, quantivis esse pretii.

Magnum deinde in hoc morbo praesidium ex iis, quae purgant alvum, petitum fuit. Haec quidem ab ipso alvi profluvio, quod saepe adest, imperari videntur, atque inter omnes constat, eadem

eadem multum prodesse : Si diarrhoea initio adest perquam levis, tum alvus sine ulla noxa potest leniter moveri, si vehemens, non item. De hac autem re prudens medicus judicabit.

Caeterum, quandocunque tale quid adhibeatur, lenissimis omnino, ut oleo ricini, sale cathartico amaro, infuso tamarindorum cum senna, cremore tartari, aliisque id genus, utendum est.

Alvum ducere, utpote subsidium catharticis utile, expedit. Id quod infunditur, quam lenissimum esse oportet, qualis est calida aqua, vel mera, vel lacte, atque oleo mixta. Talis autem curatio in cunctis febribus, et praecipue in hac, multum proficit, siquidem non modo alvum suppressam adeoque summam irritationem arcet, sed etiam, vice interni fomenti fungens, ad inflammationem doloremque tollendum pertinet.



Hac eadem de causa illitae cantharides optimo jure, quod est, ex quotidiana experientia, laudantur. Verumtamen nonnulli istas in puerperarum febre, propterea quia vesicam saepissime male habent, imponendas negaverint. Id autem mali pulvere camphorae super emplastrum insperfo minui dicitur. Caeterum aegra, dummodo medicamentum hujusmodi imponatur, liquores diluentes liberaliter haurire debet. Sinapismi denique, linimenta volatilia, panni vino adusto (Anglice *Brandy*) intincti, quasi ad abdominis dolorem auferendum pertinentia memorantur.

Quicumque cantharides, sinapismos, emplastra, &c. abdomini imponenda negaverint, praesidium ex fomentis petere debent. Si abdomen post vomitum ac dejectionem inter principia factam, quae saepe quidem valent dolorem ac ventris tumorem discutere, nihilominus vehementer laboret, protinus confugiendum est ad magnos

duplices pannos, quos laneos esse commodius est. Hos autem, ex calida expressos, per horam certe, atque aliquoties ex unius scilicet alteriusve horae intervallo, ventri imponi expedit, summa utique cura habita, ne mulier interea quo frigore afflaturve laedatur. Quantum vero fomenta inter febres, extremis inferioribus ad-mota, dolorem saepe molestiamque minuant, exhalationem per cutem, nec non somnum pariant, ex monumentis medicorum Regii Nosocomii Edinensis apparet aperte.

Calida lavatio ab aliquot, sed fortasse non ita recte, praecepta fuit.

Latices certe diluentes ad sitim nempe aver-tendam satis conveniunt; cujusmodi sunt aqua hordei decocti, sorbitio, nec non et cerevisia tenuis, utique si conditio primarum viarum haud vetet.



Si somnus usque adhuc dolore vel cujusdam partis, vel totius corporis, depulsus fuerit, intercapedo molestiae viribus opii arcessatur oportet; id quod, D. Denman auctore, fatis tuto, quotiescunque dolor vehemens urget, fieri potest \*.

Emollientia in uterum injici nonnullis placet; quorum auxilium White praesertim quam magis existimat †.

In secundo autem hujus morbi gradu, quando scilicet debilitas sit summa, humoresque in putredinem abire videntur, aegra iis, quae, apud Medicos *Tonica* appellata, cohibeant putredinem, viresque reficiant, sustinenda est.

De corticis Peruviani facultate, qua tensionem restituere, putredinemque cohibere valet, utpote

\* P. 34.

† P. 223.

utpote omnibus nota, dicere in praesentia nihil opus est. Dari quidem potest vel sub pulveris vel tincturae forma, ratione nimirum stomachi nunquam non habita. Caeterum illud quoque non ignorari oportet, eum non magnopere, nisi liberaliter assumptum, juvare.

Jam satis constat, vinum in febribus bene respondere, imo etiam illud, prudenter utique datum, omnium quam maxime stimulare roburque instaurare posse. Palato et stomacho gratum est; cordis actionem atque arteriarum auget; nec non dolorem ac delirium tollit. Verumtamen caute perquam et cogitate debet adhiberi; alioquin periculi haud parvulum timeatur. Hic enimvero, ut in omnibus, prius de tempore modoque utendi videndum est; namque ut bona fortunae perinde sunt, atque illius animus, qui ea possidet: Qui uti scit, ei bona; illi, qui non utitur recte, mala; sic medicamenta quam optima inconsulte ac temere aegris inculcata,



inculcata, tanquam benefacta male locata, praevoque usu corrupta, venenata perquam et pestifera evadunt.

Aër fixus morbis bene multis auxiliari dicitur; eum vero feбри praesertim, Typhus qui nominatur, ac Dysenteriae esse praesidio Dobson, Priestley, Rowley, &c. affirmant, contenduntque. Per clysmata immitti potest; melius autem salinis haustibus, quolibet morbi tempore, adeo sumptis, ut ipso in stomacho effervescat.

Cum debilitas in hujusmodi malo sit magna, cibus valentis materiae haud alienus est; caro autem, quamvis in ea multum sit alimenti, neutiquam convenit, quippe quae ad putredinem tendat, et difficilius concoquatur. Cibi omnes ex farre parati magis idonei sunt, et ptisana, nec non Sago, Salep, gratiora nempe vino adjecto, gelatina omnigena, cuncti acescentes fructus, poma in primis, mala cotonea, aurea, uvae,  
&c.

&c. quae fitim sedent, ac putredinem arceant emendentque.

Camphora denique, moschus, contrayerva, colomba, atque acida, seu vegetabilia, seu fossilia, huc pertinere dicuntur.

Hic, ut semper, munditiae quam maximae imperandae sunt. Stragula, vestimenta frequenter mutari, manus faciemque cubantis quotidie saltem lavari oportet.

Denique, de remedio, omnium longe praesentissimo, aëre nempe puro, sine quo universa profecto materia medica parum juvat, dicere libitum fuerit. Sed multo libentius optimum Medicinae Theoreticae Magistrum, de hac ipsa re differentem, audiri voluerim. “ Aër quoque ipse, qui purus sacram vitae flammam alit, impurus factus eandem vel statim extinguere potest, vel multis vaporibus onustus, aut nocivis  
qui-



quibusdam effluviis corruptus, ingentem morborum cohortem inducere \*.” “ Superest et una alia res, quae et cibo et potu, cum sanis, tum maxime aegris, five acutis five vetustis morbis laborantibus, magis necessaria est, et saepe omnibus medicamentis, et medicina ipsa praestantior ; aër nimirum purus et bonus, quo nihil ad vitam retinendam, et sanitatem conservandam, magis necessarium est, nec quicquam ad multos morbos sanandos utilius ; scilicet sine quo medicamenta, alioquin optima et efficacissima, parum omnino valent, et morbi, natura leves et facile sanabiles, maligni prorsus et saepe insanabiles fiunt.—Aër enim purus venenatam illam mephitim, quam sanissimi etiam homines, et multo magis aegri, a pulmone et cute usque exhalant, aufert, et per auras diffundit, donec tandem, deposita vi sua pestifera, et ipsis et aliis innoxia fiat. Purus praeterea aër corpus reficit atque  
refri-

refrigerat, vires fortasse multum labefactas confirmat, cibi appetitum et concoctionem juvat, et putredini fortiter occurrit, praesertim frigidulus. In acutis morbis apprime necessarius fit, propter rationes satis manifestas; praesertim in febribus a contagio ortis. In omnibus istiusmodi morbis, aër purus, et quam saepissime renovatus, salutaris et necessarius est. In multis aliquantum frigidior quam sanis aut gratus aut tutus esset, et saluberrimus, et ipsis aegris jucundissimus existit. Non omnes vero morbi acuti adeo frigidum aëra tolerant; praesertim qui a frigore collecto oriuntur, vel in quibus pulmones multum afficiuntur, cujuscunque fuerint originis. In omnibus vero morbis aër calidus, et impurus, et morbosus effluviis corruptus, et stagnans, neque ut decet mutatus, haud parum nocet \*.”

[Nunc

\* Ibid. p. 65.



Nunc vero de illis, quae indiciis aliquot, iisdemque peioribus occurrant, pauca differere convenit.

Et si vomitus plerumque medicamentis supra positus cohibetur, aliquando tamen vehementior diuturniorque manet. Sub quo casu iis, quae semper fere responderint, id est, Riverii haustibus, atque iisdem effervescentibus, frequenter sumptis, Laudano per clysteras immisso, siquidem stomachus jam idem respueret, &c. pugnandum est.

Alvi quoque dejectio interdum quid molestiae faceffit. In ejusmodi casu opio, vel devorato, vel in alvum ex parte inferiore indito, amylo aëreve fixo itidem infuso, aut adstringentibus, ut puta, Terra Japonica, Gummi Kino, decocto Campechensi, &c. utendum est.



Ad tussim, quae frequenter male habet, medicamina oleosa vel mucosa potius, portione tincturae Thebaicae utrisque adjecta, benefaciunt.

Doloribus denique, latera nonnunquam vexantibus, cantharides illitae, linimentum volatile, hirudines, vel cucurbitulae auxiliantur.

Verum haec ego, Academiae scilicet institutis morigerans, de Febre Puerperarum dixi; quae equidem, non certa quasi et fixa, propono, sed cuique, suo pro iudicio atque experientia, existimanda relinquo.

---

Nunc enimvero animi parum grati notam merito subirem, nisi lubens, hocce tentamine qualicunque demum perorato, gratias Professoribus Medicinae consultissimis, qui Almam hanc Academiam ornant, publice agerem haberemque.

Seorsum



Seorsum vero habenda est gratia viris eximiis, D. Cullen, Monro, et Gregory, non modo ob operam, quam mihi inter studii medici curriculum navarunt, sed etiam ob singularem benevolentiam, qua me, graviter aegrotantem, feliciter curabant. Quibus quanquam gratia referri tanta non potest, quanta debetur; habenda tamen tanta est, quantam maximam animus meus capere potest.

F I N I S.

---



